

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DATUK MOHD IDRIS BIN JUSI  
[ BATU PAHAT ]**

**TARIKH : 28 MEI 2015**

**RUJUKAN : 7914**

**SOALAN:**

**Datuk Mohd Idris bin Jusri [ Batu Pahat ] minta MENTERI DALAM NEGERI menyatakan tindakan tegas mengatasi fenomena pekerja asing merampas peluang-peluang pekerjaan dan perniagaan rakyat tempatan.**

## **JAWAPAN :**

**Tuan Yang di-Pertua,**

**Kerajaan sentiasa memberi keutamaan kepada warga tempatan untuk mengisi peluang pekerjaan dan perniagaan yang ditawarkan di pelbagai sektor. Pengambilan pekerja asing hanya dibenarkan sebagai langkah sementara bagi mengisi keperluan tenaga kerja yang gagal diisi oleh warga tempatan.**

**Kawalan dan pemantauan ke atas pekerja asing dilakukan di setiap peringkat dari proses pengambilan, kemasukan dan sepanjang tempoh keberadaan pekerja asing di dalam negara. Antara langkah-langkah yang dilaksanakan oleh Kerajaan untuk memastikan peluang-peluang pekerjaan dan perniagaan rakyat tempatan tidak didominasi oleh pekerja asing adalah seperti berikut:**

- (i) Pekerja asing hanya dibenarkan untuk mengisi jawatan yang tidak mahir dan gagal diisi oleh warga tempatan dalam 5 sektor formal iaitu sektor Pembinaan, Perkilangan, Perkhidmatan, Perladangan, Pertanian dan 1 sektor informal iaitu Pembantu Rumah Asing. Jawatan-jawatan ini juga adalah termasuk kerja-kerja yang melibatkan 3D (*Dirty, Dangerous, Difficult*);**
- (ii) Kelulusan pengambilan pekerja asing juga adalah berdasarkan keperluan sebenar industri di sektor-sektor yang dibenarkan;**

- (iii) Semua pekerja asing hanya dibenarkan untuk memasuki Malaysia melalui Visa Dengan Rujukan (VDR). Kemasukan pekerja asing di pintu masuk negara akan direkodkan ke dalam sistem *National Enforcement Registration System (NERS)* melalui pengambilan biometrik. Sistem ini merupakan pangkalan data biometrik warga asing yang bertujuan untuk mengumpul, merekodkan dan membuat saringan kemasukan warga asing ke dalam negara;**
- (iv) Pekerja asing yang bekerja di Malaysia akan dikeluarkan Pas Lawatan Kerja Sementara (PLKS) yang perlu diperbaharui setiap tahun. Melalui kaedah ini Kerajaan dapat mengetahui keberadaan pekerja asing sepanjang tempoh bekerja di Malaysia. Malahan sebelum sebarang pembaharuan PLKS dibuat, semakan rekod senarai syak dan senarai hitam Jabatan Imigresen Malaysia akan dilaksanakan terlebih dahulu bagi memastikan pekerja asing tersebut tidak melakukan kesalahan imigresen dan juga jenayah. Pekerja asing yang gagal saringan ini tidak akan diperbaharui PLKS sebaliknya akan diambil tindakan undang-undang;**
- (v) Kerajaan turut memperkenalkan pelbagai insentif fiskal dan kewangan untuk menggalakkan penggunaan automasi di sektor perkilangan, pertanian, perladangan dan perkhidmatan. Manakala di sektor pembinaan pula *Industrialised Building System (IBS)* digunakan untuk menggalakkan penggunaan jentera dan peralatan;**

- (vi) Selain itu, Kerajaan melalui Agensi Kawal Selia sektor ekonomi berkenaan kini sedang mempergiatkan program-program memperkasakan kemahiran di kalangan belia-belia tempatan dalam usaha untuk menarik minat warga tempatan untuk mengisi kekosongan jawatan di sektor-sektor yang kini diisi oleh pekerja asing;**
  
- (vii) Tindakan penguatkuasaan kepada mana-mana warganegara Malaysia yang memindah milik permit perniagaan mereka kepada warga asing atau tidak menjalankan sendiri perniagaan tersebut juga sentiasa dipergiatkan bagi memastikan perniagaan rakyat tempatan tidak dimonopoli oleh warga asing; dan**
  
- (viii) Tindakan penguatkuasaan secara holistik melibatkan pelbagai Kementerian/Agensi juga sentiasa dipergiatkan dan dilaksanakan secara berterusan untuk mengesan, menangkap, mendakwa dan mengusir PATI yang masih berada dalam negara. Tindakan tegas juga akan dikenakan ke atas majikan yang didapati melanggar Akta Imigresen 1959/63 dan Peraturan-Peraturan Imigresen 1963 seperti menggaji dan melindungi PATI.**

**Kementerian ini juga sentiasa bekerjasama rapat dengan Kementerian Sumber Manusia dan semua Agensi Kawal Selia berkenaan termasuk Kementerian/Agensi lain yang berkaitan dalam memastikan kehadiran pekerja asing di negara ini tidak menjejaskan peluang pekerjaan dan perniagaan rakyat tempatan.**